

111 年全國語文競賽客家語朗讀文章國小學生組（海陸腔）

編號 5 號

【筍蛄】羅紫云原作

「蛄」這隻字係講殼硬硬个昆蟲，像雞油蛄、透屎蛄、金蛄仔、花蛄仔、筍蛄這兜，除了花蛄仔以外，佢兜還細時節都係雞嫲蟲，但係「筍蛄」有較特別，細時有一息仔像雞嫲蟲，毋過佢無腳，還過斯食竹筍定定，像烏葉竹、綠竹筍都係佢个最愛。

「半天斬竹毋使刀，地下打窿¹毋用鋤，今年著白衫，明年著綾羅。」這係揣令仔，說明筍蛄个一生，今年著等白衫鑽落地泥肚過冬，明年正著等派頭、靚靚个衫出來結婚降子。

有一日，屋下人去山頂改竹筍，家濟仔趕出一隻寶物來，該係當久、當久無看著个——「筍蛄」，國語講「臺灣大象鼻蟲」。背囊頂柑仔色還有烏斑，烏斑較圓个安到笠嫲，係公个；烏斑較尖个安到遮仔，係嫲个，翼胛有烏色條紋，毋想飛个時節，翼會收到翼胛裡肚。肚底烏色，用佢帶鏈條掛鉤个腳溫柔个捕等竹筍，過用佢長長像麥管²个嘴筒，慢慢仔剪啊剪仔，一下仔就分佢剪一隻空來食竹筍，順續屙卵落去。

¹ 打窿：音 da' lung；打洞、挖洞。

² 麥管：音 mag` gon'；吸管。

無幾久，蟲卵變幼蟲慢慢仔大咧，竹筍尾截就分佢利利个剪仔剪斷，跌到竹頭下，佢兜山精个細人仔，透日會在竹頭下鑽上鑽下煞猛尋，係尋著該又大又肥，黃滄滄个「筍笨³」，斯膠筍蛄共下放到火爐堆焗抑係鑊嫲煎，該香香酥酥个美食，發夢想著口水就會流出來。

另外，筍蛄當好捉，在竹頭下目珠向往上看，竹筍尾係有筍蛄黏等，斯愛膠竹筍遽遽搖一下，佢就跌下來咧，毋過佢會詐死，四腳惹天恬恬橫在該，肚底又係烏色，無注意看就分佢騙過詐咧。成下運氣好會捉著幾下隻，就做得拿線網佢个腳，當會飛，細人仔就做得搞到歸晝邊。

恁多年來，屋脣个竹筍條條就出尾⁴，盡少看著佢个身影，佢緊怪怨自家係毋係膠筍蛄食絕忒咧，好得又看著佢，佢開容笑面翕下佢个特寫了後，煞煞膠佢捉到竹園肚去分佢自由生活，希望佢煞煞傳宗接代，開枝散葉。

³ 筍笨：音 sun' bun~；筍蛄的幼蟲。

⁴ 出尾：音 chud mui`；竹筍有完全長成，無斷尾。

111 年全國語文競賽客家語朗讀文章國小學生組（海陸腔）

編號 8 號

【蹶山】劉玉蕉原作

天吉光，狗吉吠，阿姆斯特在該大聲喊咧！「阿榮啊，好跣咧，日頭愛出來哩啲！」

「阿珍妹，遽遽著鞋啲，愛出門哩啲！」

天矇光，日頭還在該睡目，佢一屋人斯目睡摸些起腳花行，共下去蹶小中嶺山咧。路狹狹，草面頂个露水吉散，分佢兜个腳徑啊著，斯歸串歸串碾落地泥，一粒一粒金若若¹像珍珠樣，靚到耐毋得！佢心肝肚偷偷恸：係用佢兜來串一條珍珠骰鍊，送分阿姆戴，毋知幾靚哦！

涼爽个風，一陣一陣吹來，路脣个花花草草，分佢吹到領頭拗腰定仔行禮，斯像該戲臺頂，盡力表演个大明星共樣。行到山下，老妹湊佢拚輸贏，看麼人做得先蹶上山嶺頂去。兩儕斯恁樣頭播播，麼人都毋認輸，相爭拚往上。佢座大當然輸毋得，歸路毋敢停跔，氣掉氣急直直拚上山，蹶到山頂，抓等心臟，佢啊跳到硬硬像愛恬忒樣哦！

「哇！山頂个風還涼哦！」看往下，老妹還在半山排，一隻

面頰卵紅啲啲，佢看啊，廟肚个關公都無佢恁紅哦！一張嘴擘啊擘，又像細狗在該啟氣，實在還生趣，還好笑！

山頂个風，特別清，特別涼爽，風裡肚有東勢果子个香氣，有花花草草个清甜味緒，這風吹到人歸身鬆爽，吹到人透心涼，頭下蹶山个艱苦，到這下也做下毋記得咧！樹頂絡食个鳥仔濟濟借借，跳上跳下叫無停，草竇肚个蟲仔毋願輸佢，也唧唧滾應聲。打早，山頂斯仰般鬧熱咧！眺望²該山下，遠遠个東勢，到今還蒙等³一層紗，在濛紗煙肚睡都毋知好醒呢！

「遽遽，大家看！還靚哦！」

東片个雲像點胭脂樣，紅霞紅霞，紅霞退忒，係千條萬條金色个光，對山个背後射出來，無幾久，一隻大火球，斯對山頭跳出來咧，晟到人惹毋開目，晟到濛紗遽遽藏身。日時頭个事頭，對這下正正式起勢呢！

企在山嶺頂，佢兜放勢享受打早个光景，登高眺望个開闊眼界，分人心情爽快，分人知得感恩，感恩大自然賜分恁佢恁好个環境。阿爸長下講：「早跣床个鳥仔斯有蟲仔好食。」到這下，佢總算體會著這句話个意思咧！

¹ 金若若：音 gim` na` na`；亮晶晶。

² 眺望：音 tiau` mong+；遠望。

³ 蒙等：音 miang` nen`；覆蓋、遮住。